

17. oktober 2019

UKA 2019/40

**Iqalunnut timmisartukkut pisortat aallarnigaannik aqquteqaqqilissappat tapeeritsit assigiinngitsut qanoq ittut pisortanut, namminersortunut innuttaasunullu aningaasatigut kingunissaasat akussutissartaannik kingusinnerpaamik UKA2020-imi Inatsisartunut agguanneqartussamik Naalackersuisut suliaqaqqullugit peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Mimi Karlsen, Inuit Ataqatigiit)

Siumumi tunngaviumik isumarput tassaavoq nunatsinni innuttaasut angalaniarnikkut piffimmiit piffimmut periarfissaqartinneqarnerat tamanit salliutinneqartariaqartoq. Nunatta iluani angalaniarnikkut periarfissat killeqareeqqisut akisusinnaasaqisullu tamanit ilisimaneqarpoq, naak inuiaqatigiit akiliuteqarnermikkut kiffartuussinerit assigiinngitsut periarfissanngortinneqartaraluartut.

Nunarput angisoorujussuummat inuillu ikkittuinnaallutik kiffartuussinermik isumaqatigiissutitaqanngitsumik nunatsinni angalasoqarsinnaanngittuassasoq ilimanarsinnaavoq, naak akilersinnaanerusumik iluanaarutitaqarfiunerumillu angalanerup piviusunngortinneqarnissaannut sulineq annertuut ukiuni makkunani pigaluartut.

Maannamut tikikkuminassutsikkut nunatta inissisimamut eqqarsaatigigaanni kimmut akitsinnut taamatullu naggueqatitsinnut angalaniarnikkut periarfissagut killeqartarsimaqaat, akilersinnaassuseq pigineqarneq ajormat. Taassumaannaalluunniimmi tunngavissippaatigut aqqissuussaqaq taamatut ittoq atorlugu misilleeqqinnissaq pissusissamisuunngitsoq.

Naalackersuisullu akissuteqaataanni isuma Siumumi annertuumik soqutiginaateqarsinnaasutut isumaqarfigisarput tassaavoq Canadami oqartussaasuniit aningaasaqarnikkut akuunissamut soqutiginnittoqarnerisooq annertunerumik paasisaqarfigissallugu. Ilimanaateqarluarsinnaavormi akitsinniit toqqaannarnerumik nunatsinnut aamma aqquteqartoqarsinnaneranik kissaateqartoqarsimasinnaanera. Taamaammat avitseqatigiinnikkut periarfissarsiorsinnaaneq soqutiginaateqartissinnaagipput Siumumi isumaqarpugut.

Taamaattorli tamassumap siulliullugu misissorneqarnissaa Siumumiit utaqqissutilaaqqaarusunneruarput, tassami mittarfisigut annertuumik inerisaagaluttuarneq maanna aallarereersooq qularutiginningsigu aqputinik nutaanik aamma pilersitsiffiujumaartoq – qularnanngitsumik aamma kimmut.

Taamaammat siunnersuut manna itigartitsissutineqarnissaa Siumumiit inassutigarpugut.

Anders Olsen, Siumut.